

# MIQUEAS

## Jawen unanmati janchaki

Diosun jancha yuixunika Miqueasin kenekinan, año 750 Jesucristo judiamatian jatu kenexunkin Israelin enabu inun Judán enabu Diosun nemati jancha jatu axunikiaki. Jabun chakabuwaiwen taexun Diosun jatu kupixanaikidi inun Mesías Cristo juxanaikidi jatu kenexunikiaki, Judá anu xanen ibui Jotam inun, Ahaz inun, Ezequías ja dabe inun besti jabu xanen ibujaidai jiweaitianan. Jaska Diosun jawenabu jiwea jatu uinkatsis ikai inun jaska chakabuwaibu jatu kupixanai na una kene uinkin nun tapintiduki.

---

## Samaria inun Jerusalén anu jiweabu Diosun jatu kupixanikiaki, na janchadan

**1** <sup>1</sup> Miqueas Moréset anua Jehová jaki nukuxun namai keskawen jawen jancha jau jatuki chanikauntanxanun Samaria anuabu inun Jerusalén anuabu Jehován jawen jancha jatu yunukubainikiaki, eska jatu waxanaikidi yuikinan, Judán enabu mai pakea anua Jotam xanen ibui inun, ja kachu Ahaz xanen ibui, inun ana ja kachu Ezequías xanen ibujaidai badi ichapa ja dabe inun bestitun jatu yunukubainaibutianan.

<sup>2</sup> Mae tibi anu jiweabu inun nukun mai pakea jidabi anu jiwebaunabuun,  
na eska jancha matu yuinun ninka peidawakubainkanwen.  
Jehová janu jaki nukuti Templo medibi anuxun  
jaska chakabuwakin man kanekubainmis  
matu chitekin matu yuikubainxanikiki.

<sup>3-4</sup> Jawen jiwe anua kainkidani mati matipa mamaki  
niakidanaya jawen tae paitan jutsekekainai anua  
mati tibi payukui keyuxanikiki,  
yawa xeni bin chi dapi tsauan payukumis keskaidan.  
Napanpa pebia jene wakin mai tuax adabexanikiki.  
Ui ichakayamai bai matai kushibidanai keskakin

jawen kushipawen jaska waxanikiki.

5 Jacobun enabun Diosun jancha chibanma danankubainaibu inun  
Israelin enabu xanen ibubun chakabuwakubainaibuwen taexun  
jatu jaska waxanikiki.

Jacobun enabun Diosun jancha danankubainaibudan,  
¿jania ikanimenkain?

Samaria maewan anuxun akanikiki.

Judán enabun mai pakea anuxunan,  
¿janixun yushibu dami kenwanmisbumen?  
Jabia Jerusalén maewan anuxun amisbuki.

6 Jaskawen taexun Jehován jatu yuikin:

“Samaria maewan mishki jiwe tibi inun  
jatun kene tibi di akin keyutan  
napaku anu jatun mishki tibi en jatu udenmaxanaii,  
ja dukun mishki buya ewapa wakin tsamabaunibu  
bepenmana xabakabi uintidubu wakinan”, aka  
januxun maewan xaba washinabu anu  
uva nishi banatidubu bai en waxanaii.

7 Jatun yushibu mishki dami wanibu dasibi teke teke akin keyuxun  
dasibi jatun yushin ji dami medibi mapua kuakin keyuxankanikiki.  
Jatun kenwantidan, ainbu jininipa keskawen taexun  
jawen pei ichawamisbu  
dami inun jatun yushin ji dami medibi wanibuwen taexun  
betsa wakin ja ainbu jininipabun daya pei keska  
ana pei betsa wakin dami waxankanikiki.

**Jatuwen taea Miqueas juinti nishmajaida inikiaki, na janchadan**

8-9 Samaria anu yushibu dami kenwainbu beya pae  
tsuan nemakin jatun chakabu jatu xuxa watidubuma  
Judán enabu jadi jatun mai pakea anu Jerusalén anu  
janu enabu jiweabu anudi na jabun atimapa jatu amaibu ma  
jikidiawen taea

juinti nishmajaida en kaxa chakayamakunkainxanaii.  
Jaskawen taea nikauni bichi taeuma inun,  
tadiuma nia kaman inu keskai kaxakunkauni inun,  
yuinaka peiya avestruz keumis keskai en nia ketanxanaii.

10 Judán enabu Jehován kupixanai  
nawan maewan Gat anu jatu banabimayamakanwen,  
jau matu ninkai benimayamanunbun  
jatu uinmai jatu bebunua kaxamadan.  
Jakia matun mae Bet-le-afra anu

- nui paewen isin teneai keskai  
 mai mishpu anu dakatan  
 tadame tadame ixankanwen,  
 ibubis dake paepaidan.
- 11 Safir anu jiweabuun,  
 chajajaida matuki sinataibun matu iyuxankanikiki,  
 tadiuma matu dakejaida wabainkinan.  
 Zaanán anu jiweabu jawa kainbaini  
 paxama ixankanikiki.  
 Bet-ésel anu jiweabuun, matudan,  
 tsuan matu medabewama jabianu besti kaxajaidai  
 man jani kama ixanaii.
- 12 Ja Jerusalén mae anuabu jatun jikiti xui beputiya anu  
 Jehován jatu chakabu jikimaima keska shinain  
 Marot anu jiweabun medabewati pepa manajaidai  
 isin paepa tenejaidai keskai  
 xau babujaida mania uminakeakexankanikiki.
- 13 Laquis anu jiweabuun, matudan,  
 Israelin enabu Samaria anu jiwenubu keskakin  
 Jehován jancha danankin yushibu dami jau kenwanunbun  
 Sión anu jiweabu man jatu chakabuwakin taewaniwen taexun  
 paxanun, iwanan, caballo jawaida kainti  
 jawen tadanbainti ichapaki nexakin keyuxankanwen.
- 14 Moréset-gat anu jiweabu  
 man jatu ana uianma ixanaiwen taexun  
 jawada pepa jatu inankuintan  
 jatu nichinxankanwen, jatu iyuxankanikikidan.  
 Ja maewan Aczib janu Israelin enabu xanen ibujaidabu junei  
 idubiaibudan,  
 jadixun jatu achixankanikiki,  
 janu bidun keskawenan.
- 15 Eska Jehován matu yuikiki. Ninkakanwen:  
 “Jau matu achinunbun  
 matun mae Maresá anu jiweabu  
 en matuki sinataiwen taea  
 matu anu xanen ibu kushipa betsa ana en matu yunuxanaii.  
 En jatu jaska waya uinbaini  
 Israelin enabu anua xanen ibumisbu tibibun enabu paxai  
 Adulam anu mai kini tanpe anu junei  
 jikinun ika buxankanikiki.
- 16 Jerusalén uke medan Sión mishki kenebaunibu kushipa anu  
 jiweabuun,

ea ninkakanwen.

Matun bakebu man jatu bechipajaidaiwen taea  
matun jointi man nishmajaidai jatu unanmakin  
matun bu maxtekei mankukanwen.

Matun bakebu achitan chajaida anu jatu iyuxun  
ana jatu chintuanbuma ixanaibuwen taea  
ana matun bu maweden iki keyukanwen,  
xeten buxka keskaidan”, jatu wanikiaki.

**Kushipakin jatu ichakawaibu Jehován jatu  
kupixanikiaki, na janchadan**

- 2** <sup>1</sup>Namawen dikabi chakabu yubakakubainaibudan,  
jpeidaxankanwan!  
Matun kushipawen man atidubuwen taea  
ja xaba man akaitian bestentan  
man jatu chakabuwakubainmisbuki.
- <sup>2</sup> Jatun yunu bai pepa ibuyabiaken jawen kemukin  
biankin man jatu mebinmisbuki.  
Jatun jiwe pepa anu ibu jiwebiaken kemukin  
biain man yumetsumisbuki.  
Baiya jatun bake jenexunbainxanaibu  
ja yudabu jawenabuyabis jatu ichakawakin  
man jatu nuitapawamisbuki.
- <sup>3</sup> Man jaska jatu wamisbuwen taexun Jehován matu yuikin:  
“Matun besti man jatu ichakawamaki.  
Eadi matuki tana en yubaka jayaki.  
Matu anudi chakabu en yunuxanai jani paxama  
jawen juinsinai peti man jawa binuama ixanaii.  
Jakia ma dasibi chakabu bika tenemati juken  
ana kein jawenduai man bai tanai mapuama ixankanaii.
- <sup>4</sup> Ja xaba jaskaitian man jatun xanen ibububia nui paewen kaxakin  
matunabu sain ikin kaxakin matukidi jabuwaxankanikiki:  
‘Dasibi ma nuku chakabuwakin keyuabuki.  
Nukun mai pakea Jehovánabiaken  
juni betsabun ma nuku ibuwainmabuki,  
man jawa jatu nemamadan.  
Nukun yunu bai dasibi mebintan  
nukudi achitan nuku ma paxkakin keyuabuki, ibuwankinan’,  
iwanan,  
kaxabetanan matu ja akubainxankanikiki”, jatu wanikiaki.
- <sup>5</sup> Jaskawen taea Jehován maewan matu inanbiani  
ana jawenabui jawen mae anu man jabe jiweama ixankanaii.

**Diosun jancha yuixunika chakabubiaken  
bechipainibukiaki, na janchadan**

- 6 Padanananikabun yuikin:  
 “Jaska chakabu juxanai  
 jau nukuki ana chani beyamanunbunwen.  
 Ja chakabu jatun nuku dake watidu juama ixanikiki”, ikaibun  
 7 “Nun Jacobun enabudan,  
 tsuan nuku yuputidumaki.  
 Dios jin jin ikama  
 tenexun nuku manamisdan,  
 ¿ma benuamen?  
 ¿Jaskamismen, Diosdan?” ikaibun

jakia Jehován yuikin:

- “Tsuada jiwei pekubainaibu  
 en janchan jatu medabewakubainmiski.  
 8 Uatian enabu ibiashina shinan betsa watan  
 natian man eki sinatai.  
 Jabu detenametani chintunbidankin  
 jatun tadi pepa kadujaida beaibu man jatu mebinmiski,  
 tsuan matu ana metiduma dabanen shinankinan.  
 9 Jatun jiwe bechipaiaibu anua ainbuaibu jatu nichinkin  
 jawen pepati mai en jatu ibuwamani anu  
 jatun bakebu ana jiwetidubuma wakin  
 man jatu biankin nemakubainmiski.  
 10 Na maedan, janu juindukunti kayabimawen taea  
 benitan budikanwen.  
 Nenu atimapajaidawen taexun  
 chakabuwakin yamawakin keyuxankanikiki.  
 11 Tsuada chanichakakin yuikin:  
 ‘Vino inun shia paepa man ea inankubainaya  
 Dioskidi en matu yusinkubainxanai’, ikaya  
 na yudabun jaska chakabu bechipaikin  
 en jancha yuixunika jatu wai  
 jaska jatun shinan, pejidaki, ixankanikiki”, itan,

**Jhován jawenabu ana ichawatan jatu iwexanai  
jatu yubanikiaki, na janchadan**

- 12 Jehován ana jatu yuikin:  
 “Ichakanikabu jatu kupi keyutan  
 Jacobun enabu dasibi ana jatu ichawakin

ja Israelin enabu chai jatu iyunibu  
 jatida ichapama texenibu en jatu ichawaxanaii.  
 Chaxuwan kenekauana anu mapuabu inun  
 basi midima anu mapuabu keska  
 en jatu ichawaya  
 yudabu midima benimai jancha chakayamaxankanikiki.  
 13 Dios bebukainkin jawen bai bepenbainaya jabun chibain  
 maewan kenebaunibu jikiti xui jawen beputi anua taxni  
 ishchubainbainxankanikiki.  
 Dasibi bebun jatun xanen ibu en Jehová kaya  
 ea ichun buxankanikiki”, iwanan, ea yuimaki.

**Yununika chakabubu Jehován jatu dananikiaki, na janchadan**

**3**

<sup>1</sup> Israelin enabu xanen ibubu inun yununikabuun,  
 natian ea ninkakanwen.  
 ¿Yunuti kushipa pepadán, matunamaken  
 man unankatsi ikamamen?

<sup>2</sup> Jakia jaska shinanma pepa danankin  
 chakabu man bechipaikubainmiski.  
 Enabun bichi dashpexun  
 jawen nami besti bikin keyuxun  
 jawen xau jenebaina keska  
 man jatu chakabuwakubainmiski.

<sup>3</sup> Enabu jatu ichakawakin  
 man jatu paxa pia keska wamiski.  
 Betsabu jatu achixun jawen bichi dashpetan  
 jatun xau tseka tseka axun  
 kentiki bawanun, iwanan,  
 jawen nami mexte mexte akin  
 enabu jiweabu jatu piai keska wakin  
 man jatu ichakawakubainmisbuki.

<sup>4</sup> Chipu xaba betsatian medabe ea Jehová man yukabiaya  
 en matu kemama ixanaii.  
 Man chakabuwakubainmiswen taea  
 janu man ea yukaitian en matu ninkakatsi ikama  
 matu anua en junexanaii.

**Diosun jancha yuixunika padanananikabu Jehová  
 jatuki sinatanikiaki, na janchadan**

<sup>5</sup> Diosun jancha yuixunika padanananikabun jatu yusin chakaibuwen taea  
 enabu jiwei peama bai chakabu tanabaini jamakidi  
 bukubainkanikiki.

- Tsuabunda jatu pimakubainaibu bestikidi  
 unanuma jiwetikidi jatu banabimakubainmisbuki.  
 Jakia tsuanda jatu yaniwamabumawen taexun  
 tsakanamei beaibukidi jatu yuikubainmisbuki.  
 Jehován jabukidi eska jatu yuikiki, ninkakanwen,  
 jabu jawen jancha yuixunikabubiakenan.
- 6 “Matubudan, ana meshu medan jawen unanmati man namai  
 man ana xabakabi uianma ixanai inun  
 jaskaxanai meshu medan Diosun matu unanmakin  
 jaska inunbadiai matu uinmamawen taea  
 matun kushipa man benuxanai,  
 badi kai meshukainai keskaidan,  
 jawada man unanbiaima  
 ja xabatian meshu meshuwai keskaidan.
- 7 Diosun jancha yuixunika inun  
 jaskaxanai unantidubu dasibi jamenxankanikiki.  
 Jatun shinan benushinabun jatuki kaxeaibun  
 Diosun jatu kemamawen taea  
 dakei pes manixankanikiki,  
 jawa yuiamadan.
- 8 Jamen ea Miqueasdan, Jehován jancha danankin  
 Israelin enabun chakabuwakubainmisbu  
 jatu bedabinwankin jatu yuankin  
 en jatu ja akubainxanun  
 ea kushipa inankin datetima ea wakin  
 Jehován Yushinin jawen yunuti kushipa pepawen ea  
 amakubainikiki.  
 Ea jaska wakin jeneama ipakeikiki.

**Jerusalén chakabuwaxankanikiaki, na janchadan**

- 9 Israelin enabu xanen ibubu inun yununikabuun,  
 ikis ana eska ninkakanwen.  
 Yunuti kushipa pepa danankin bechipaiama  
 jawada pepa dasibi yushtumabiaken  
 man yushtu wakin keyumis keskabuki,  
 eska tibi akinan.
- 10 Tsuabunda matu nemaibu detekin  
 jatun jimi chakawakin nukunabu ichakawakin  
 Mati Sión anu kebenkin  
 nukun mae Jerusalén anu jau benikubainunbun  
 man jatu yunua chakabuai dayakubainkanikiki.
- 11 Xanen ibu bexmas unanti wanikabun

nukun mae anuxun june pei bikatsi  
 jatun chakabu pewakin jatu padanmisbuki.  
 Diosbe nukunabu janchaxunikabun jatu yusinkinan,  
 pei binun ixun besti jatu yusinkubainmisbuki.  
 Jamen Diosun jancha yuixunikabun  
 Jehován jaska akaiwen benimawai dabanen  
 Diosun unanmashina yuikatsi pei bitan jatu yuikin:  
 ‘Nukun xanen ibu Jehovádan, nukubeki,  
 nuku mekekubainaidan.

Nuku medabewamiswen taea  
 jawa chakabu nuku anu jutidumaki’, iwanan, jatu yuimisbuki.

- <sup>12</sup> Matubun man kanekubainaiwen taexun  
 Mati Sión anu maewan Jerusalén bedankin keyuaibu betsai  
 mishki besti janus mania bai wanixun  
 ana akatsi jeneyuimabu keska anu  
 mananan janu Dioski nukuti jiwe wanibu anu  
 chaka besti benea jawama dakaxanikiki.”

**Jehová xanen ibukin dasibibu jatu unanuma jiwemakubainxanikiaki,  
 na janchadan  
 (Is 2.2-4)**

**4** <sup>1</sup> Janu badi jawen jenei ma kemaya  
 ja mati anu Jehová kenwanti Templo jayaken  
 Jehová jakidi janchakin mestenwanxanikiki.  
 Ja mati binua anuxun jakidi pe shinankin  
 mati tibi binua anu nawa xukua betsa betsapa bexankanikiki.

<sup>2</sup> Sión anua Jehován yusian taxni  
 Jerusalén anu jawen jancha kainxanaiwen taea  
 yudabu midimajaida janu jikitushitan yuikin:  
 “Jhován Mati Sión anu mapekenun bekanwen,  
 Jacobun mekenika Dios Jehová kenwanti Templo anudan.  
 Jadixun jawen pe jiwekin shinanti nuku yusian  
 ja bai keska jawen yusian jancha chibankin  
 tapin nun maputiduki”, iki  
 ma ichai keyua maniabun

<sup>3</sup> januxun nawa xukuabu tibi  
 Jehován jatu unanti wakubainxanikiki,  
 chaijaida jiwebia ja yudabu ichapajaidabu  
 jawawenda taea ja imisbu  
 jadatuda pepaimabu inun jadatuda kaneimabu  
 unantan jatu pewakinan.  
 Jatu jaska waya jatun mabu maei betsaidan,



- jatun nupe kenu chaipabu betsa wakin  
 jawen mai xexabidanti wakin  
 jatun jashi betsa wakin  
 nupe xewetia waxankanikiki.  
 Ja jaskaibutianan, ja yudabu ana jatun detenameti mabu betsa  
 betsapawen  
 ana tsuabubeda detenameama ixankanikiki.  
 Ja inun, detenamei bukatsi jatu yusinmisbu  
 ana tsuan jatu yusianma ixankanikiki.
- 4 Jaskawen taea dasibi ana jawawen dateama jiwekubainxankanikiki.  
 Jatun uva bana nishi manaundi bexea inun  
 jatun ji higuera bimi batapaya naman uta  
 unanuma juindukuin manixankanikiki.  
 Jehová kushipajaida dasibi binu keyuatun  
 juni betsan janchawenma jawen janchawen ibubis matu yuikiki.
- 5 Jaskabiayanaya ikis yuda xukuabu betsa betsapabun  
 jatun mekenika yushibu ninkakin  
 ja chibankanikiki.  
 Jamen nukubunan,  
 nukun mekenika Dios Jehován yusinti jancha ninkakin  
 ja jeneama nun ja chibankubainaii.

**Jatu ichakawabiaibun jawenabu medabewakin  
 Jehován jatu mekexanikiaki, na janchadan**

- 6-7 Chanima jawen jancha mestenwankin Jehován yuikin:  
 “Xaba betsatian enabu chaxuwan keska paxkabainibu  
 en ana jatu ichawaxanaii.  
 Tidi keskabu inun, jin ikai keskabu inun,  
 jaikaimas sa aka keska wakin  
 en jatu kupibiani  
 ena wakin en jatu ana ichawaxanaii.  
 Betsabu jatu iyukin inun betsabu jabu iyuama bashibainibu  
 ichawaxun  
 yuda xukuabu kushipajaida en jatu waxanaii.  
 Jaska watan Mati Sión anuxun mekekin yunui  
 ea kayabis Jehová en jatu xanen ibupakexunxanaii.
- 8 Mia min Jerusalén maewanan,  
 kushipa wakin mishki kenekin  
 benawanibu Sión anuxun yunukin  
 ana kushipatan ja maewan ana benitan  
 enabu dasibi min xanen ibuxunxanaii,

jaska xanen ibujaida kushipabun  
jatu yunupauni keskadan”, akin ea yuimaki.

9 Jehová ma yubakaimawen taea  
¿jaskai man bis bis ikai, ainbu bake kain isin imis keskaidan?  
¿Xanen ibujaida kushipa man jayamamen?  
¿Pe yusinika jawen xanen ibujaida medabewanikabu ma  
mawaimabumenkain?

10 Matunabu nichianbu kainbaini  
maema anu jinamas jiwekubainaibu  
uxakubaini Babilonia anu matu iyuxanaibuwen taea  
Sión anu jiweabuun, yuda isin uminai bis ikubainkanwen,  
ainbu bake kain isin memis keskaidan.  
Jakia jadixun matuki sinatakin matu iwanibu anua jabukidi  
sinatakin  
Jehován man jawenabu matu ana mebikinankin  
matu piskumaxanikiki.

11 Natian matu chakabuwanun ixun  
yuda xukua betsa betsapabu  
matuki sinataibu ichatan yuikin:  
“Jatun mekenika yushinen jau jatu dananun  
Jerusalén anu jiweabu medibima detsis keska  
bechipaikin nun uin bukatsis ikaii”, ikubainaibu

12 jakia jaska Diosun shinain yubakakunkainai  
ja yuda xukuabun unanbumaki.  
Xekiwan tsekaxun janus buxukuaxun  
tsumabaina keska wakin  
jabun jawenabu ichakawaibu  
Diosun jatu ichawaxanai jabun unanma  
Dioskidi jancha chakabukanikiki.

13 “Yuda xukuabu ichapa teke teke akin  
xemekin man jatu akawaxanunbun  
ina awa bene kushipa mane hierro maxun inun  
mane bronce juntsisya keska wakin  
puben wakin ean en matu mesewaxanaii”, akin  
Jehován matu yuiaiwen taexun  
“Sión anu jiweabuun,  
benitan jatuki pai pai ixankanwen.  
Jatu ichakawakin jatu detetan  
mane oro inun mane plata inun

mabu pepa ichawanibu  
 jatu anua mebinkin keyutan,  
 en ea mai jidabi xanen ibu  
 man ea medibi wakubainxanii”, itan

**Davidin enabu anua besti Mesías taxninunbadikiaki, na janchadan**

- 5** <sup>1</sup> jakia detenamenikabun matu kexebaunshinabun  
 Israelin enabu xanen ibujaida nuitapawakin kupijaidaxanaibuwen  
 taexun  
 man Jerusalén anu jiweabuun,  
 jawen jatu nemaxanun, iwanan,  
 dasibi matun detenameti mabu pewakanwen.
- <sup>2</sup> Jaskabaiibun man Belén Efrata anu jiweabuun,  
 na jancha ninkakanwen.  
 Judán enabun mai pakea anu min mae pexepishtabiaken  
 mia anua xanen ibu taxnitan  
 Israelin enabu dasibi yununika kushipa ixanikiki,  
 bawakin Diosun taewadiama jiwenidan.
- <sup>3</sup> Jaskabiaxanaya natian nawabun matu ichakawakin  
 jau matu kupinunbun  
 Jehován ana matu mekeama  
 Israelin enabu Jehován matu ma jeneaki.  
 Jakia ainbu tuyaken jawen juni bake kaiain manaibun  
 Israelin enabu chaijaida anu jatu iyunibu  
 jatun matu chintunwanbidan ana matunabube matu dasiwaxanikiki.
- <sup>4</sup> Ja juni kaini ewatan xanen ibu kainkin  
 jawenabu mekekatsi  
 jawen mekenika Dios Jehován kushipawen  
 jawenabu mekekubainxanikiki,  
 nuku unanuma jiwemakinan.  
 Mai jidabi kesua anuxun  
 Jehová kenwankubainaibuwen taexun
- <sup>5</sup> xanen ibujaida pepatun jatu  
 unanuma jiwemai juken  
 Asiria nawabun nukun mai pakea achinun ika bexun  
 nukun xanen ibubun jiwe jawendua tibi anu ma jikiaibun  
 jau jatu nemakin nichintanunbun 7 xanen ibu unanepabu  
 inun 8 juni mentsisipabu jatunabube  
 nun jatu yunuxanii.
- <sup>6</sup> Jabun Asiria nawabu jatun xenipabu Nimrod ini anua  
 nupe chaipa kenujaidawen jatu nichinkubainkin  
 detekin keyuxankanikiki,

nukun mai pakea achi keyunun ika beimabu  
Asiria nawabu nuku jatu nemaxunkinan.

**Jatuki sinataibu Israelbun jatu tenankin keyuxanikiaki, na janchadan**

- 7 Yuda xukuabu betsa betsapa midima anu  
Jacobun enabu jatube jiwebaunabudan, eskaxankanikiki.  
Ja jaskaibudan, basnun Jehován yunumis inun,  
basi anu ui ikai  
tsuan jaskai jawen shinanen nematiduma keskai  
Jacobun enabu keyukubaini eskadabes texexankanikiki.
- 8 Jaskabaiibun yuinaka xukua inu betsa leónen jatu achitiduki.  
Ina chaxuwan xukuabudi jatu achidiakin jawa betsa jeneama  
tetsan akin tenanmisbu keskai  
yudabu xukuabu betsa betsapa midima anu  
Jacobun enabu jiwebaunabu jabiaskadiai  
kushipadiaxankanikiki.
- 9 Jehováan, jaska keska wakin  
miki sinataibu detekin jatu yamawakin keyuxanwen.

**Yushibu dami inun detenamemisbu jawen jenekin  
Jhován jatu yamawaxanikiaki, na janchadan**

- 10 Yuda dasibibu Jehován banabimakin  
jawen jancha mestenwankin jatu yuikin:  
“Xaba jatianda matun detenameti caballo detekin tenanxun  
matun detenameti tadanbainti chakabuwakin en  
yamawaxanaii.
- 11 Matun maewan chakabuwakin betsa wakin  
matun mae mishki kenebaunibu kushipa tibi  
bedankin en keyuxanaii.
- 12 Mukayabu yamawakin keyutan  
jawada unanikabuma jabu en matu jenexanaii.
- 13 Jawada matun mekenwen  
ja kenwanti dami ibubis man amis  
man ana kenwanpakeyamaxanunbun  
yushibubu dami dasibi inun mishki medibi nichinibu  
dasibi chakabuwakin en yamawaxanaii.
- 14 Matun kenwanti ji medibi mexte chibu nia inun  
ji betsa peiya dasibi betse keyuxun  
matun maewan dasibi chakabuwakin en keyuxanaii.
- 15 Yuda xukuabu tibitun en jancha ninkakin  
chibankatsi isbuna jatuki sinata paepakin  
en jatu kupijaidaxanaii.”

**Jhován Israelbu ana jatu ja anikiaki, na janchadan**

- 6** <sup>1</sup> Eska Jhován matu yuikiki. Ninkakanwen.  
 “Benitan mati keyatapatun matu ninkatidu keska shinankin  
 man jawa chakabu jayamakidi jatu yuikin  
 mati yudabu keska shinankin  
 matun jui jatu ninkamakanwen.
- <sup>2</sup> Mishkipawan anu janu mati tsaua anu  
 mati tibibuun, ninkakanwen.  
 Jhován jawenabu pewakin jatu ja akikiki.  
 Israelin enabu chakabubu jatu unanmai ninkakubainkanwen”, itan
- <sup>3</sup> ana Jhován matu yuikin:  
 “Enabuun, ¿jawa en matu chakabuwaimamen?  
 ¿Jawawen en matu bika tenemaimamen?  
 ¡Ea yuikanwen!
- <sup>4</sup> Egipto nawabun jatu ichakawaibu  
 jatu dayama chakayamai nemakin  
 Egipto mai pakea anua  
 jau jabun jatu iyukubainunbun  
 Moisés inun jawen betsa Aarón inun jawen pui María  
 ean en jatu yunua  
 matun xenipabu jatu iyumakin  
 ean en jatu taxnimabidaniki.
- <sup>5</sup> Enabuun, natian ekidi jaska shinankubainkanwen.  
 Matun xenipabu bukubainaibu yupunun ika  
 jaska Moab nawabu xanen ibujaida Balac yubakabiaya  
 jaska Beorin juni bake Diosun jancha yuixunika Balaamnen Balac  
 nema  
 matun xenipabu yupuama iniki.  
 Ja dikabi betsa eska shinankanwen.  
 Sitim anua matun xenipabu kainbidani  
 Jene Jordán pukebidani  
 Guilgal anu jiki bukin  
 ea en Jhová jau ea unanunbun  
 en jatu medabewakin binumani  
 jaska ana shinankin tapinkanwen”, akin matu yuikiki.

**Jau jaskai yudabu jiwununbun Jhován shinain  
 Miqueasin jatu yuinikiaki, na janchadan**

- <sup>6</sup> Jhová daewanun ixun  
 eska man shinanmisbuki.

Daewakin Jehová Dios manaundi jiwea kenwankin  
 ¿jawa pepa en inankuintidumen?  
 Ina awa bene año bestichaiya tesentan  
 jawen nami inun jawen xeni Jehová kenwankin  
 jau ea kuaxununbun, iwanan,  
 nukunabu Diosbe janchaxunikabu yunukin  
 ¿en daewatidumen? ixun  
 ¿man jaska shinanmismen?  
 7 Januxun benimawakin 1,000 chaxuwan bene inun  
 10,000 shumu piti xeni en jatu kuamaxunaya  
 ¿Jehová ewen benimaxanimenkain?  
 Jehová daewakin en juni bake iyua en jatu kuamaxunkin  
 jawen jancha danankin  
 en chakabuwakubidanima  
 ¿tede akin en yamawatidumen?  
 Kanekin jaska man shinanmiski.

8 Junibuun, Jehová daewakin man jaska watidumajaidaki.  
 Jawada pepakidi Jehován ma matu yuinuxun matu manaikiki.  
 Jawen yunuti kushipa kaneama inun,  
 pepa aki bechipainamei  
 yuda betsabuwen nuikunkaini inun,  
 ibubis keanma matun mekenika Diosun jancha ninkakin  
 ja besti chibankubainkanwen, matu waniki.

**Padananain chanichakamisbukidi ana Jehován  
 jatu ja anikiaki, na janchadan**

- 9 Maewan anu jiweabu Jehován jancha kaiyanan  
 tsuada datekin ninkakubainmis jadan, unanepaki.  
 Jehován matu ana yuikin:  
 “Maewan anu jiweabu inun  
 unanepa medabenanikabuun, ea ninkakanwen.  
 10 Jabu ichakanikabun jatu atimapa wakin  
 mabu inun pei ichawakubainaibu  
 juni chakabubun jiwe anu jayabuki.  
 Yaushi mabuwen kemui  
 jawa jatu tana pewaxun inanma yumetsuaibu  
 en jatu bechipaismajaidaki.  
 11 Jawen xankama unankin tanati chakabuwen jatu padankubainmisbu  
 ¿jatun chakabu tede akidan,  
 jaskatan en jakimatidumen?  
 12 Na maewan anu dasibi peiyabun

- jatu ichakawakin mabu inun peiwen kemukin jatu padain  
chanichakakin  
jadakidi jatu nitimawakanikiki, jatunas wakinan.
- 13 Man jatu jaska wamiswen taexun  
matun chakabuwen kupikin matu yamawakin en taewabainaii.
- 14 En matu kupikubainaya  
pibiai man jawa yaniwatan  
pepeama buni pae tenei man nuitapakunkainxanaii.  
Jawada matu mebinun ika beaibu  
matun bai anua piti bixun june jatuki datekin  
man jani paxawatiduma ixanaii.  
Jawada piti texe ja pikatsi  
man mekekatsi june adubiaken  
jau yamawai benunbun  
nawa detenamenikabu en jatu yunuxanaii.
- 15 Bai anu banabiatan man jawa tsekama ixanaii.  
Olivo ji jawen bimi xeniya tsekaxun  
man tsinibia jawen xeni man jawa biama ixanaii.  
Uva bimi batapa tsekaxun jaki pai pai ikin  
jawen jene man bibia uva vino  
man jawa akama ixanaii.
- 16 Samaria anu xanen ibukin  
Omrínen jatu yunukubaini inun  
Ahabin enabun chakabuwakubainibu  
jatun beya tapinixun  
chibankin man jabiaskadi wakubainaii.  
Jaskawen taexun matun maewan chakabuwakin yamawakin  
janu jiweabun matuki kaxekin  
jau matu dakewakin datenunbun  
en jatu yunuxanaii.  
Jaska enabun man ea dakewakubidanibuwen taexun  
eandi en matu dakejaidawaxanaii.”

**Israelin enabu jatun chakabukidi ana jatu yuinikiaki, na janchadan**

- 7** <sup>1</sup> Bimi ma tseka keyuabu  
uva bimi batapa inun higo bimi batapa pinun, iwanan,  
benakin en jawa bechiama  
jen peidawa! en ikai keskadi.
- <sup>2</sup> Jabiaska keskadiai mai jidabi anu  
juni pepabu inun nuikipabu Dios chibainbu  
eandi en bechiamadiki,  
tsua ana jayamakanen.

- Jakia pubein detename bestikin  
 chakabuwanun ixun  
 dasibibu manakanankanikiki.  
 Betsabu tibibe chakabunun ika  
 bidunwan keska maniabuki, manakanainan.
- 3 Jatun xanen ibubunan, eska jatu wakanikiki.  
 Jatu dayaxunun, iwanan,  
 xanen ibu bexmasbun pei jatu yukakin  
 jawena wakubainaibun  
 xanen ibu betsa unanti wanikabun  
 june jatu pewakin pei bikin  
 jatun chakabuwen jatu kupisbumaki.  
 Kushipabun jaska akatsis ikai akubainkin,  
 maewan jidabi atimapa wakin  
 jau chakabu bestinunbun yusinkubainmisbuki.
- 4 Tsuabuda: “Jabu pepabuki”, abiaibudan,  
 ji muxa keska chakabubuki, mesedan.  
 Tsuabuda: “Jabu nuikipabuki”, abiaibudan,  
 mae muxa keska chakabubudiki, mesebudan.  
 Jakia jaska Diosun tsuma chaninikabun  
 ma jatu banabimayama ja xabatian  
 jatu kupixanai ma juikiki,  
 jatubetan chakabu inun pepa pewaidan.  
 Jatianda itimaska chakayamakubainaibun
- 5-6 juni bakebun jatun ibu junibun jancha danankin  
 ana jawa jatu duawabumaken  
 ainbu bakebundi jatun ewan jancha danain  
 ana jawa peabumaken  
 jawen babawanbundi jatun yayan jancha  
 ana ninkakatsi ikabuma  
 jawenabu kayabibe dasibi sinatanamexankanikiki.  
 Jaskawen taea matu dapi jiweabun jancha ikunwanyamaxankanwen.  
 Min jaibun mia jawada shinanxunai  
 ninkatan jaki chiti iyamaxankanwen.  
 Ja dikabi min ainbe min janchabiaidan, uindawe.
- 7 Jakia medabe en yuka ea ninkaxanaiwen taexun  
 ea jatun piskumaxanai Dios manakakin  
 Jehová besti juai en manakubainxanaii.

### Jehová Israel medabewaxanikiaki, na janchadan

- 8 Eki sinaitabu Israel anuabuun, en chakabuwen taea  
 ibubis en bika teneai uin



- ewen benimayamakanwen.  
 En di ibiama en ana benikauanxanai,  
 chakabu meshu keskatun ea achibiabaunken  
 Jehová en xaba keska en mekenan chaxakapaki.  
 9 Kanekin chakabu wakín Jehová en paxkaima  
 eki sinataya: “Enaki”, ixun  
 jawen sinata en tenexunkubainxanai.  
 En jaska wakubainmis unanti watan ea pepa wakín Jehová en jatu  
 kupixunxanai adiamaken  
 jin jin ikama en manayukubainai.  
 Jatu maemakin ea uinmakín jawen kushipa  
 xabakabi Jehová en chakabu unanti wakín  
 ea unanmaxanikiki,  
 bin dekua keska anu ea iyukinan.  
 10 Eki sinataibun ea bika wakín yukakín:  
 “¿Min Mekenika Dios Jehová dan, janimen?  
 ¿Juama daka? mia medabewardan”,  
 ea akubainimabun Jehová en jatu maemai uindiaxankanikiki,  
 jaska jancha chakabu kankainkin jatu dakewadan.  
 Baiwen kakín  
 pupus pema pema aka keska wakín jatu kupiaya  
 jatu jaska wai uin en shinan chankanxanai.

**Jerusalén ana benikin bena waxankanikiaki, na janchadan**

- 11 Jerusalén anu jiweabuun,  
 matun mishki kenebaunibu di abianibu  
 matun mae benawakín  
 ana matun mai pakea xekakín  
 ewapa wai ma matu ana axuin bekanikiki.  
 Shinaindakubainkanwen.  
 12-13 Januxun jatunabu jiwexun  
 chakabuwakubainibuwen taea  
 ja mai betsai janu tsua jiweabuma keskai chakabuaya  
 Asiria mai pakea anua inun,  
 Egipto mai pakea anua inun,  
 Jene Nilo anua inun,  
 Jene Éufrates anu jiwebauni nati ikabu inun,  
 ianenwan ukebukun jiwebaunabu inun,  
 mati matipa anu jiwebaunabu  
 jabu dasibibun matu bechipai  
 janu matu anu bexankanikiki.

**Miqueasin jawenabu Israelbu medabewakin  
Dios jatu yukaxunikiaki, na janchadan**

- 14 Mai pepa kesua anu ji xukua anu  
chaxuwan juindukunmisbu keskai  
minabu jau tadi jiwekubainxanunbun min aniki.  
Jehováan, ja minabudan, jatu mekexun uindakubainxanwen.  
Mae Basán inun mae Galaad anu  
basi pepa anu jatun xenipabu min jatu iyuni keska wakin  
pepas anu jatu ana iyuxanwen.
- 15 Egipto anua nukun xenipabu jatu taxnimabidankin  
dami atimaska min jatu axuni keska wakin  
ana jatu uinmakubainxanwen.
- 16 Nawa betsa betsapabu:  
“En kushipaki”, ibiamisbu  
jau min kushipa uin dakekubainunbun  
jaska min jatu axuni jabias dami atimaska akin jatu  
uinmadiaxanwen,  
jau juyu inun pata keska mapuxun uinunbunan.
- 17 Dunu inun nixeke mai bemaki xadabainmisbu keska  
datei saki saki iki  
jatun mae mishki kenebaunibu kushipa anua  
jau taxnibidanxanunbunwen.  
Datejaidakin medabewati mia yukai mia bebun buxankanikiki.

**Jawenabuwen Jehová nuikin jatun chakabu jatu  
buaxunkubainmiskiaki, na janchadan**

- 18 Nukun mekenika Dios Jehováan,  
minabu eskadabes texeniwen nuikin  
min jancha danankin nun chakabuwaima  
tede akin min ana shinainsmawen taea  
Mekenika Yushin mia keska betsa tsua jayamaki.  
Nukuki sinatapakeama maintan  
jaska min nuku bechipaiai  
min nuku uinmamiski, nuku duawakubainkinan.
- 19 Nukun chakabu maiwakin inun  
ianenwan medan pukua keska watan  
nuku jeneama nukuwen ana nuikunkainxanwen.
- 20 Jaska nukun xenipabu Abraham inun Jacobube min yubakani keska  
wakin,  
Jehováan, medabewakin nukuwen nuikin  
min yubakani jancha nuku jakimawayamakubainxanwen.